



www.BibleForChildren.org


युहन्ना 14



येसु चेलासबके कहलकै, “तोरासबके मन बेचैन नै हेबे। तुसब परमेस्वरमे बिस्वास करैचिही आ हमरोमे बिस्वास कर। हमर पिताके घरमे बहौत रहैबला ठामसब छै आ हम तोरासबके लेल रहैबला ठामसब तयार करैले जाइचियौ।”



“यदी तेहन नै रहतियै त हम तोरासबके यि बात कहबे नै करतियौ। हम ज्याके तोरासबके खातिर ठाम तयार करलाके बाद फेनो एबौ, आ तोरासबके आपन लग ल्याजेबौ, तैल्याके हम जते रहैचियै ओतै तुहुसब हमरसडे रहबिही।”



हम युहन्ना, खिरिस्टमे तोरासबके भैया चियौ। येसुमे
बिस्वास करलाके कारन हम तोरासबसडे धिरज होके
सहने चियै, जे दुख ओकर राजमे हैबलासबमे


सेहो आबैछै। परमेस्वरके बचन आ येसु
खिरिस्टके करल सतके




बारेमे परचार करलाके
कारन हमरा पत्मोस
टपुमे कैद कैरके
राखने छेलै।




हम तुरन्त परमेश्वरके आत्मासे भरलियै। स्वरगमे एकटा सिंहासन रहै आ ओइमे एक गोरा बैठल छेलै।




तब स्वरगमे, पिरथिबीमे, पिरथिबी निचा पतालमे, समुन्दर
आ ओते भेल सब परानीके अनड कहैत हम सुनलियै,
“सिंहासनमे बिराजमान हैबलाके आ
थुमाके इस्तुती, आदर, महिमा
आ बल सदा-सरबदा हेबे।”




तब हम परमेश्वरसे बरके लेल कनिया जखा सिङ्गार-पटार करल, अरथात पबितर सहर, लया यरुसलेम, स्वरगसे निचा आबैत देखलियै। तब हम सिंहासनसे एहेन कहल एकटा बरका अबाज सुनलियै, “देख, परमेश्वरके बास लोकसबसडे भेल छै। परमेश्वर ओइसबसडे बास करतै आ उसब ओकर लोकसब हेतै। परमेश्वर आपने ओइसबके परमेश्वर भ्याके ओकरासबसडे रहतै।”



तकरबाद स्वरगदुत हमरा इस्फटिक जखा चमकदार जिबनके
पानीके लदी देखलकै। उ लदी परमेस्वर आ थुमाके सिंहासनसे
निकैलके, उ लदी सहरके मुल रस्ताके बिचसे बहैछेलै।



उ सहरमे इजोतके लेल सुरुज आ चानके आबस्यक नै छै,
कथिलेत परमेस्वरके महिमा ओतेका इजोत चियै आ थुमा
आपने चिरखा चियै।




महज असुध चिज, घिरनित
काम करैबला आ झुठ
बोलैबलासब उ सहरके भितर
जाइले नै पाबतै। थुमाके
जिबनके किताबमे नाम
लिखलहासब मात्रे ओते
जाइले पाबतै।




“परमेश्वर ओकरासबके आँखके पुरे लोर
पोइछदेतै। ओते मिरतु, सोक, बिलाप आ
दुख नै हेतै। कथिलेत पुरन्का सब बात
बित गेलछै।”




आबसे उ सहरमे परमेस्वरके सरापके कोनोभी बात नै रहतै।
परमेस्वर आ थुमाके सिंहासन ओते रहतै आ ओकर सेबकसब
ओकरा सेबा करतै। उसब परमेस्वरके चेहरा देखतै आ ओकर
नाम ओइसबके कपारमे लिखल रहतै।



हम बरका आ छोटका सब मरलसबके सिंहासनके सामने
ठारभेल देखलियै आ किताबसब खोललकै। दोसर किताब
खोललकै, जे जिवनके किताब छेलै। उ किताबमे लिखल
अनुसार, ओकरासबके काम अनुसार मरलसबके नियाइ भेलै।
जकर-जकर नाम जिवनके किताबमे लिखल नै
भेटलै, ओकरासबके आइगके भठिमे फेकदेलकै।



पबितर आत्मा आ कनिया कहैछै, “आबु!” जे लोक सुनैछै,
उहो लोक कहे कि, “आबु।” जे पियासल छै, उ आबे आ
जकरा इक्छा लागैछै उ जिबनके पानी मडनिएमे पिबे!



कथिलेकी परमेस्वर सन्सारके लोकसबके
एहेन परेम करलकै कि उ आपन एकलौता
बेटाके देलकै। ओकर उपर बिस्वास
करैबला नास नै हेतै, महज उ
अनन्त जिबन पाबतै।



रोमी 3:23 कथिलेत सबलोक पाप करने छै आ परमेस्वरके महिमा तक पुगैले चुकल छै।

रोमी 6:23 कथिलेत पाप करैबलाके बैन मिरतु चियै, महज फोक्टेमे देल परमेस्वरके बरदान त अनन्त जिवन चियै जे अपनासबके परभु येसु खिरिस्टमे देनेछै।

हिबरु 9:27 जहिनड लोकसबके एकबेर मरनाइ निश्चित छै तहिनड मरलाकेबाद ओकर नियाय निश्चित छै।

एफिसी 2:8,9 कथिलेकी परमेस्वरके अनुग्रहसे तुसब बिस्वाससे बच्याल गेलचिही। तुसब आपनेसे कोसिस कैरके नै, यि त परमेस्वरके देल बरदान चियौ। यि तोरासबके कामसे नै भैलछौ, नै त लोक घमन्ड करतियै।



रोमी 10:9,10 यदि तु येसुके हमर परभु चियै कहके आपन मुहसे सुइकार करबिही आ परमेस्वर ओकरा मरलसे जिबित करलकै कहके आपन हिरदयमे बिस्वास करबिही त तोहर उधार हैतौ। कथिलेत लोक आपन हिरदयसे बिस्वास कैरके परमेस्वरके अगा धरमी ठहरैछै आ बिस्वास करल बात आपन मुहसे सुइकार कैरके उधार पाबैछै।

युहन्ना 3:16,17 कथिलेकी परमेस्वर सन्सारके लोकसबके एहेन परेम करलकै कि उ आपन एकलौता बेटाके देलकै। ओकर उपर बिस्वास करैबला नास नै हैतै, महज उ अनन्त जिबन पाबतै। परमेस्वर त आपन बेटाके सन्सारके दोसी ठहराबैके लेल नै महज ओकरसे सन्सारके लोकसब बचे कहके पठेलकै।

1 युहन्ना 5:11-13 उ साक्छी यि चियै कि परमेस्वर अपनासबके अनन्त जिबन देने छै आ उ जिबन ओकर बेटामे छै। जकरसडे परमेस्वरके बेटा छै, ओकरसडे जिबन छै आ जकरसडे परमेस्वरके बेटा नै छै ओकरसडे जिबन नै छै। तुसब परमेस्वरके बेटाके नाममे बिस्वास करैबलासबके हम यि चिठी लिखैचियौ, ताकी तुसब अनन्त जिबन पाबनेचिही कहके थाह हेबे।



युहन्ना 14; २ कोरन्थी 5; परकास 4, 21, 22

Storyline by: Edward D. Hughes

Illustrated by: Lazarus
and Alastair Paterson

Adapted by: Sarah S.

Tharu Kochila NT (thq) © Wycliffe Bible Translators, Inc. All
rights reserved.

<https://www.bible.com/bible/3290/MAT.1.MTH>

©2025 Bible for Children, Inc.

www.M1914.org

www.bibleforchildren.org

